

Banku Mundial no Governu Timor-Leste Apresenta Projetu Estrada Dili-Ainaro ba iha Komunitade

Liga populasaun sira ba iha merkadu no mos ba serbisu publiku importante sira iha koridor Dili-Ainaro nian

Dili, July 14th, 2014 – Ohin loron, Governu Timor-Leste apresenta projetu hadian estrada Dili-Ainaro ba iha komunitade. Liu husi projetu ida ne'e, Banku Mundial fo suporta ba Governu hodi hadian estrada koridor ho distansia 110 km nebé liga distritu Dili ba to'o distritu Ainaro.

Seremonia apresentasaun ne'e diriji husi **Sr. Gastão de Sousa, Ministru Obras Publika** nian no hetan sasin husi **Franz Drees-Gross, Diretor Banku Mundial** nian ba **Papua Nova Guiné, Timor-Leste no Illa Pasifika**, iha Laulara, Distritu Dili.

Estrada husi Dili ba to'o Ainaro hanesan ligasaun importante ida entre parte norte no parte sul nasaun nian no liga distritu hamutuk tolu—Dili, Aileu no Ainaro—nebé tau hamutuk sai hanesan tersu ida populasaun Timor-Leste tomak, ne'e inklui mos agrikultor sira.

*“Hadian asesu ba estrada nian sei lori benefisiu sosial no ekonomiku ba estadu no mos ba povu sira tanba estrada nebé diak halo komunitade sira fasil atu halo konesaun no faan sira nia produsaun ba iha merkadu”, tenik **Ministru Obras Publika, Enj. Gastão**. “Estrada ne'e mos sei fornese asesu ba turismu nebé mak sei promove dezenvolvimentu ekonomia hodi hasa'e qualidade moris povu sira liu husi asesu ba iha saude no mos edukasaun”*

*“Nesesidade ba infra-estrutura estrada nebé mak forte, hodi bele ajuda populasaun sira nebé moris iha koridor Dili-Ainaro ne'e, hanesan buat ida nebé 'real' no presiza atu atende ho maneiru ida nebé mak lalais”, tenik **Drees-Gross, Diretor Banku Mundial** ba **Papua Nova Guiné, Timor-Leste no Illa Pasifika**. “Banku Mundial sei kontinua suporta hafoin seremonia ida ne'e hodi bele garantia karak Estrada ne'e sei sai ho qualidade diak hodi povu bele uza” nia kontinua*

Projetu estrada ne'e hola parte iha **“Timor-Leste Road Climate Resilience Project”** ka *Projetu Estrada Tahan Klimatika*, lansa iha tinan 2011 nebé mak halo ona rehabilitasaun emerjensia nian ba sesaun balun husi estrada ne'e, nebé mak hetan estragu durante inundasaun no husi udan boot.

Projetu ne'e agora sei foka hodi rehabilita tomak estrada ho distansia 110 km nian nebé liga distritu tolu ne'e. Obra konstrusaun nian sei estabiliza estrutura estrada nia enkosta, hadian tan baleta kuak (drainajen) no sei halo detallu dezeñu ba hadian estrada iha loron oin mai nebé liu husi distritu tolu ne'e.

Sistema ba manutensaun no ba responde urjenti nian sei ajuda Governu hodi bele halo planu hodi bele hataan ba eventu temporada nian hanesan, rai-monu no udan-boot.

Projetu ne'e implementa husi Ministeriu Obras Publika no hetan ajudu finanseiru husi Banku Mundial hamutuk Tokon Dollar Amerikanu Neen-nulu (US\$60M). Fundu ne'e fahe husi Doasaun IDA nian ho Tokon \$20, Kreditu IDA nian hamutuk tokon US\$25 no imprestimu IBRD nian hamutuk tokon US\$15. Governu Timor-Leste rasik kontribui tokon US\$53 ba projetu ne'e.

Sydney: **Kym Smithies** – Communications Officer, (+61) 02 9235 6570, ksmithies@worldbank.org
Dili: **Joao dos Santos**, Communication Assistant, (+670) 77480294, jdossantos@worldbank.org

